

– Հարստութիւններ շատ կան մեր երկրում, պարոն բժշկապետ, – ասաց սրբազանը ցաւակցական եղանակով, – մեր հանքերը լի են արծաթով, գառիկով, պղինձով, մենք ունենք նաւթի աղբիւրներ, առատ քարածուխ եւս գտնուում է մեր լեռներում, ուրիշ ինչե՛ր չունենք մենք, բայց օգուտ քաղողներ չկան: Եթէ ձեզ նման ճանապարհորդներ յաճախ այցելէին մեր կողմերում եւ ուսումնասիրէին երկիրը, մենք բախտաւոր կը լինէինք:

– Այդ իրաւ է, – ասաց Ասլանը եւ, նայելով ժամացոյցին, աւելացրեց, – ներեցէք, սրբազան հայր, ես բաւական ժամանակ խլեցի ձեզանից: Գանապարհորդները առհասարակ սաստիկ շատախօս են լինում, բայց ես չափը անցայ: Ձեր հաղորդած տեղեկութիւնները այն աստիճան թանկագին էին ինձ համար եւ գրաւիչ, որ ես չէի կարող օգուտ չքաղել:

– Շատ ուրախ եմ, պարոն բժշկապետ, – ասաց սրբազանը մի առանձին բարեսրտութեամբ, – դուք ինձ մեծ բաւականութիւն կը պատճառէիք, եթէ, որքան ժամանակ այստեղ կը մնայիք, շուտ-շուտ տեսնուէիք, գուցէ՛ ես կարող կը լինէի ուրիշ ծառայութիւններով եւս պիտանի լինել ձեզ:

– Շատ շնորհակալ եմ, սրբազան հայր:

Այդ միջոցին սրբազանը վեր կացաւ, մտաւ կից սենեակը եւ մի քանի րոպէից յետոյ վերադարձաւ, ձեռքում բերելով մի օտարոտի բան, որը առաջարկեց Ասլանին, ասելով.

– Դուք ինձ շատ յարգած կը լինէիք, եթէ յիշատակի համար այդ չնչին նոէրը ընդունէիք ինձանից եւ դասէիք ձեր հաւաքած հնութիւնների կարգում:

Դա փոքրիկ թիակի ձեւով մի գործիք էր փղոսկրից շինած: Նրա կոթը զարդարուած էր ամենանուրբ քանդակներով, իսկ գլուխը կնոջ քնքոյշ ձեռքի նմանութիւն ուներ, որի ափի մէջ երեւում էին խարտոցի ատամների պէս փափուկ խազեր: Ասլանը ձեռքում բռնած երկար նայում էր նրա վրայ, յետոյ, երեխայի պէս ուրախանալով, ասաց.

– Ես այն աստիճան սիրահարուած եմ հնութիւնների վրայ, սրբազան հայր, որ եթէ դուք չտայիք այդ գեղեցիկ ընծան, ես պատրաստ կը լինէի մինչեւ անգամ գողանալ ձեզանից:

– Իսկ ես ձեր այդ փոքրիկ մեղքը կը ներեի, որպէս հոգեւորական, – պատասխանեց սրբազանը նոյնպէս ուրախանալով:

Ուղիղն ասած, ես էլ չկարողացայ զսպել ինձ, սկսեցի ծիծաղել այդ հաւաքների վրայ: